

MY BIBLE FIRST

PRIMARY YEAR A
Q 4 #47

Vanmite in Pasian' Thukham Kem

SUNDAY

1 Pasian in Samuel a hopih hun in amah pasalno hilai hi. Moses zong Pharaoh kumpi inn ah a om dingin, ama singkuangneu pan a kilak in neu kiukeu lai hi. Moses le Samuel-te in bangbang a piang zongin Pasian it-in, muangin, a thu manh ding na teel uh hi. Bangzah-a teelna hoih ahi hiam! Pasian in a mite ahuh dingin amau nihte na zang hi.


Samson le Eli in zong tua bang deihteelna na bawl le uh, Pasian in amau zongsatna hoih lote a laihsak ding hiam? Philistine te bang kizo khin thei ding hi. Ahih hangin tu in Samuel hong khantoh sungin a gal Philistine te hong thahatkik uh hi.


Eli' tate siatdan, gitlohdan Israel sunga mikim in thei uh hi. Eli in banghang in amaute tua zah-in sia uh hiam cih dong ngei hi napi, a kizam zahin taii lo hi.

Pasian in Samuel a hopih khit ciangin mikim in ama thu na thei hi. Shiloh ah Pasian bia dinga hong pai a citak sunte a ciahkik uh ciangin Pasian in Samuel a hopihna thu amaute in midangte na gensawn uh hi.

A sawt loin, Samuel makai suak ding cih mi khempuuh in thei uh hi. Ni khat ni ciangin amah pen amaute' thukhenpa leh kamsangpa hiding hi. Tu in bel amah khangno lai hi. **1 Samuel 3:19-21.**

Israel mite in a galte uh ahi Philistine mite do dingin khentatna nei uh hi. Pasian donglo pi-in amaute in a galte na do sawm uh hi. **1 Samuel 4:1.**

 **NGAIHSUN-IN:** *Israel mite in a galte uh a zawh ding uh pen Pasian' geelna a hiam? Himah hi! Ahih hangin Pasian in amaute a huh thei diam? Banghang huh thei ding? Ahibkeh banghang huh theilo ding?*



KAMNGAH

“Keimah TOPA ka hi hi; tua in ka min ahi hi!
Ka minthanna midang khat tungah ahikeh
hong kiphatna milimte tungah ka pia kei
ding hi. **Isaiah 42:8, ZIV.**

**I am the Lord, that is My name; and My glory
I will not give to another, nor My praise to
graven images. Isaiah 42:8**

MONDAY

2 Philistines te in Pasian leh a thukham thu thei khin uh hi. Ahih hang Isreal mite milim bia in, amaute tawh hong kibat semsemna a muh uh ciang in Israel-te' Pasian a vanglian lopi danin ngaih-sun uh hi. A sawt loin, amaute in Israel mite a sila dingin kaih sawm ta uh hi. Tu in Israel mite zong galdo ding kipan ta uh hi. A kidona mun pen Shiloh pan kigamla lo hi. Kua in galzo hiam? **1 Samuel 4:2.**

A galte un Israel galkapte tul li that uh hi. Bangzah in dahhuai hiam! Israel upate un tel zolo uh hi. Banghang in Pasian in amaute huh lo hiam cih lamdangsa uh hi. Pasian' kamciam ah, “na tua cih uh leh” a cih pen mangngilh kha ahi uh hiam? **Joshua 23:10-13.**

Tua khit ciangin geelna khat nei uh hi. Tua geelna thak tawh amaute kuamah in gal lelsak zolo ding cih thei uh hi. **1 Samuel 4:3.**

Tai 20 a gamlatna Shiloh ah manlang takin thu vai-khak uh hi. Eili' tate Hophni le Phinehas in tua geelna thukimpish uh hi. Tua vai ah, Pasian donglo leh Pasian phalna om lopi in, amaute in biakbuk panin thukham singkuang lakhia uh-a, Israel-te leh Philistine-te kidona mun ah paipih uh hi. Israel galkapte in Hophni le Phinehas, tua thukham singkuang tawh a giahphual sung hong lut uh a muh uh ciangin bang hih uh hiam? **Aneu 5.**

Philistine mite in tua thukham singkuang a tun lam

a theih uh ciangin bang na ci uh hiam? **Aneu 6-8.**

 **NGAIHSUN-IN:**

Philistine-mite in Israelite mite na encikden uh hi. Pasion a it lote leh Ama Thupiak Sawmte a zui lote in eite' gamtat kampaute hong en gige dingin na ngaihsun hiam? Amaute gamtat danin en zong i hih ding a baih hiam? Leitung mite' et TV

movie, YouTube-te en-in, amau paina munte pai a, amau nekte mah ne a, amau puansilh kizep dante na zui kha pahpah hiam? Hih thu ngaihsun in.

TUESDAY

3 Jericho a galdona ah thukham singkuang a paipih uh ciangin gal a zawhna uh, Philistine mite'n thei uh hi. A lauh ding mah uh ahi hi.

Israel mite in tua ni-in galzo mawk le uh a vekun amaute sila suak ding, cih thute ngaihsun uh hi. Tua manin Philistine mite in bang hih ding khentat uh hiam? **1 Samuel 4:9.**

Tua galdona ah Philistine mite'n zo uh hi. Ahizongin bang thu piang lai hiam? **Aneu 10, 11.**

A kido masakna ah galkap 4,000 a sup pen a dahhuai bek hilo, 30,000 galkap a sihna ngaihsun in! Tua ban-ah agalte un thukham singkuang laksak lai uh hi!

Tua ni-in Hophni leh Phinehas kithat hi. Pasion in piang ding hi a cih pen tua lian mah hilo a hiam? **1 Samuel 2:34.**

A sawt loin, a mite in Amah it-in, muangin, a thu man ding in a teel vua uh, Pasion in bang kamciam pia hiam? **Joshua 23:8-11.** Mite in Pasion tungah a cihtak uh ciangin, Pasion in amaute huh ding ci-a a kamciam pen a tangtungsak hiam? **Joshua 21:45.**

Ahizongin Satan' thu man ding a teel uh ciangin Pasion in amaute a huh thei diam? Huh thei lo ding hi.

Tu in amaute in minam khat ahih khit nungah a lipkhap-huai thupiang khat a thuak uh hita hi. Dawibia a galte un thukham singkuang laksak khin uh



hi. Biakbuk siangtho sunga a thupipen om nawn lo hi. Thukham singkuang a om detna mun awng ta hi.

 **NGAIHSUN-IN:**

Philistine-te in thukham singkuang pen Israel-te' pasian sa uh hi. Tua singkuang sunga suangpek tungah Pasion' gelhsa thukham zuih ding a thupit lam Israel mite nangawn-in mangngilh uh hi. Thumanna in galdona ah zawhna ahihkeh lelhna piangsak hi. Pasion in amaute thupha pia nuam napi pia theilo hi. Thupiak Sawmte zuih ding teelna in Satan' ze-etna hong zosak ahihkeh hong lelsakzaw ding diam?

WEDNESDAY

4 Shiloh ah, khua mu lo dek lianga a teek Eli, gal kidona thu a zak ding ngaklah mahmah in, khuapi kongkhak ah a tu hi. A diak-in thukham singkuang bangmah a cih loh ding lunghimawh hi. Tua thukham singkuang bangci ding hiam? Tua leh a tapa nihte e leh? A tate in a khan sungin Pasion' Thupiak Sawmte a zuihsak khak loh pen kiphawkkik hi.


A tawpna ah galdona pan kamtai khat hong tai hi.

Thu hoih lo tawh khuapi sungah lut-in Eli khengsuak hi. **1 Samuel 4:12, 13.**

Eli in khuapi sung pan kahna le tauna aw za ahih manin bang thu piang a hiam ci-in lamdangsa hi. Amah'n a theih kul hi. Tua kamtaipa thusia a ko dingin ama kiangah hong nawhpai-kik hi. **Aneu 14-17.**

Eli in kamtaipa' genteng ngai gige hi. Israel mite'n gal lel in, Hophni le Phinehas te kithat hi. Kamtaipa in thukham singkuang zong Philistine mite'n laksak hi a cih ciangin Eli adingin thuak-hak lua hi. **Aneu 18.**

Tua ni mah-in Phinehas i zi in tapa khat nei hi. Amah Pasion a it numei khat ahi hi. Philistine mite in thukham singkuang a laksak ban-ah a pasal leh Eli a sih lam a zak ciangin amah zong a lungsim kitamkham in a si hi. **Aneu 19-22.**

 **NGAIHSUN-IN:** *Eli a tate a neu lai-un hopih bek hilo in, daan na pia hileh tua in amaute huh zawdeuh dingin na ngaihsun hiam? A pa uh i thu na mang le uh Pasion thu a man ding a baihzaw diam?*



Nu-le-pate in a tate uh daan a piak uh ciangin, thuman dan kisin ding a thupitzia a theih man uh abi hiam?

THURSDAY

5 Biakbuk sungah a siangthopen mun hawm ta hi. Thukham singkuang a omden pen koi tengah om ta a hiam? **1 Samuel 5:1, 2.**

Philistine mite kipaak mahmah uh hi. Amaute in thukham singkuang pen Israel mite' a biak uh a vanglian pasian na sa uh hi. Tu in thukham singkuang leh amau Dagon pasian a neih uh tawh, Philistine mite in gal kidona khempeuh a zo dingin ki um uh hi.

Amaute in Ashdod a daw i a biakna biakinn sungah thukham singkuang a koih khit uh ni khat khit ciangin zingsang tungin mite va pai uh a, amuh thu in a maute kilatsak hi. A Dagon uh koi tengah om hiam? **Aneu 3.**

Dagon pasian a pumpi tung lam mihing tawh kibangin a nuai lam ngasa tawh kibang hi. Mite in manlang takin a Dagon uh phongkik uh hi. Ahih hangin a zingciangin tua dan mah na piangkik hi. Tu in na sizaw lai hi. **Aneu 4.**


A pasian uh a lutang leh a khutte kitankhia cih bek hi loin, amau sunga mi tampite in uilut natna ngah uh hi. Tua ahih manin Ashdod mite in bang hih sawm uh hiam? **Aneu 6–8.**

Gath leh Ekron ah bang piang hiam? **Aneu 9, 10.**

Thukham singkuang a kipaiphna khua khempeuh ah buaina om hi. A tawpna ah, amaute in khua pua lam-a lo sungah a koih uh ciangin zusate in lo sunga a piang ankungte nei uh hi. Tua ban-ah, amau lobuk/ansal sunga om an kikholte zong ne mang uh hi.

Kha sagih khit ciangin thukham singkuang in amaute phattuum a piak loh lam thei khia uh hi. Amau gamukpi ngate kikum uh-a, a mipilte un Egypt gam mite tunga Pasian nasep dan phawksakkik uh hi.

Mipilte in leng athak khat bawl-in a tungah thukham singkuang koih un, ci hi. Tua khit ciangin a an uh a ne zusa (simbeng)te dan-a kibawl kham tang nga leh uilut tawh a kibang kham tang nga let-song in koih kul ding hi, ci uh hi. Tua leng a kai dingin bawngno a nei khin bawngpi nih zatkul dinga, a bawngnote inn ah nusiak kul ding hi, ci uh hi. A bawngte in a bawngnote nusia in Thukham singkuang tawh Israel mite kiang amau le amau in a kaih uh leh, Philistine mite' tunga thusia a tunna pen Israel-te' Pasian in thukham singkuang a kepsak nop loh man hiding hi, a cihna hiding hi, ci-in mipilte'n gen uh hi.

 **NGAIHSUN-IN:** *Pasian in singkuang sunga a om suangpek tungah a gelhsa Thupiak Sawmte a kem lai mah hiam? Kem lai mah hi. Tuata a thupi lai mah hiam?*

FRIDAY

6 Tu in kisin hun hita hi. Leng thak tungah thukham singkuang kikoih-in, bawngpite a kai dingin om khin uh a, bawngnote in a zuhi loh nangin khih uh hi. Bawngpite in a note uh a nusia uh diam? Philistine mite in bang piang ding cih en gige uh hi. Ngaih tak-in ham kawm-in, bawngpite in a note omna pan kihei-in Israel mite omna Beth Shemesh lam manawh-in pai uh hi. Tu in Philistine mite in Israel-te' Pasian amaute a sangin hatzaw hi, cih thei ta uh hi. **1 Samuel 6:11, 12.**




A sawt loin, Beth Shemesh khua-mi lo a nasemte in bawngnam ngaih mahmah za uh hi. A et uh leh bawngpi nih in aleng tawh thukham singkuang a kaih mu uh hi. Amaute'n bang hih uh hiam? **Aneu 13–16.**

“Thukham singkuang hong tungkik hi,” cih thu manlang takin kizel hi. Khuapi sung pan mite hong pai khia ngeingai uh hi. A sawt loin mite lawp takin thukham singkuang en in, a piangsa thuteng gen hi.

Singkuang sung et ding a kiphal loh lam a theih uh hangin mite in mu nuam mahmah uh hi. A tawpna ah mi khat kihangsan sakin thukham singkuang hong hong a, mite in a sung en uh hi. Dawibia Philistine te nangawn-in tua cih ngam lo uh hi.

Pasian in Israel mite zahtakna thu a hillh meng meng ding kizam hi. Mi tampite tua mun-ah si pah uh a, tampite lau gawp uh hi. Amaute in khua dang mite tua thukham singkuang a la dingin sam uh hi. Tua manin Levi mite hong pai in la khia uh a, Levi minam ahi Abinadab' inn ah kum tampi sung kikoih hi.

 **NGAIHSUN-IN:** *Eite in biakinn sung i zahtak thei zawlai diam? Inn a biakpiakna i neih ciang, thungen dinga i khukdin ciang? Annek thunget i neih ciang nangawn ah e? Na bangci ngaihsut hiam?*

FURTHER STUDY: 1 Samuel 4–6; *Patriarchs and Prophets*, pp. 582–589; *The Story of Redemption*, pp. 185–191; *The Bible Story*, vol. 3, pp. 155–159.



THE STORY CORNER

Nasem Pasalno Kideih-Part 2

Adapted by Amy Sherrard

Mr. Peter kongvanneu tungah “Pasalno kideih” cih lai kisuang lai hi. Johnny le Charllie tua laisuan nuihsan uh a, Mr. Peters pen mi a theih ngei lak-ah mi banglo phadeuh in ngaihsun uh hi. A nih-un tua nasep ngah ding hanciam ngei uh himah leh, ni khat a sep khith ciangun Mr. Peters in ciah sak ziauziau hi.

Tom Mills zong tua sai-ah nasep siau ding hong pai ciangun amah in Johnny le Charlie thute thei selo hi. Mr. Peters in nasep a piak ciangun amah in tua inn khumdei khuazing sunga a kekseu sik-tukilh, sikkual gial nei, sik-hekna leh a tuamtua kikoihna singkuang a om lam thei kha lo hi. Johnny le Charlie zong tua vante gual sitset dinga kisawl ngei khin ahih lam zong thei kha lo hi.

A ni nihni zingsang ah, nasep a sawl ding dang aom nawnloh ciangun, Mr. Peter in inn-khum-a tua singkuang a hah dingin sawl hi.

Sun annek hun a cin ciang Tom inn khumdei ah omlai hi. Mr. Peters in, “Na man nai hia?” ci-in sam hi. Tom in, “Man nai keng ei, Pu aw. Hih ding tampi om lai hi,” ci-in dawngkik hi.

“Aw, ahih hangin sunan nek hun hita hi. Na nek khith ciang paikik-in semkik thei teh,” ci-in Mr. Peter in a gen hi. A cih danin Tom in hih pah hi.

Sun tha-pai Tom in inntungkhum ah na sem hi. A tawpna ah Mr. Peter in a sapkik ma in Tom kahlei pan hong tuaksuk hi. Mr. Peters kiangah Tom in, “Ka siam tawp-in ka sem khin a, singkuang taw ah hih ka mu hi,” ci-in dollar sawm kham tang khat a pia hi.

Mr. Peters in, “Kham muh nading mun hilo mah hiven mate?” a cih kawm in tua kham a ip sungah guang hi. Hih na muh lungdam ing, tua leh zingciang nong paikik ding hong lamen ing ei.


Tom a ciah khith ciangun Mr. Peters a inn khumdei ah

kahto hi. Tua sungah singkuangsau khat om in a sunga om nate a tuam tek a nam ciat-a kidei sitset, hoihtak-a kikoih sitset a, a min zong laidal tawh ki-at sitset hi.

Mr. Peters hong nuihmai biabua hi. “Hoih ei,” amah le amah hong kigen hi: “Pasalno ka dei dan ka mu taktak ta hi; hih pasalnopa kaampai in ka um hi. Amah pen a hoih, a kidawm thei nasem khat leh a citak khat hi. Tua kham tang a ip sungah a koih theih ziauh hiven. Amah’n ka theih lam thei lo a.”

Johnny le Charlie in nasep a ngah lam a theih uh ciangun sawt vei a sem dingin lamen lo uh hi. Ahih hangin kongvangneu tungah lai kisuangkik nawn loin Tom in sang a kihon ciang zong sang tuah khith ciangun na sem thei hi.

Mr. Peters in amaute ciah sak a, Tom nasem ding a cialsuakna ahang Johnny le Charlie in thei zolo uh hi. Ahizongin kum tampi khith ciangun, Mr. Peters’ nasep-na mun ah na paikhak aleh “Peters, Mills, and Co.” cih lai kisuang khat na mu ding hi. Tu in Tom pen sawltak hi nawn lo a, khangno mi hau khat hita hi. Ama zumkhan kawm tungah nasep a kipat zawh a sawt lo-a Mr. Peters in a piak, thubulphuh khat kisuang hi. Tua thubulphuh in bang hiam cihleh, “A neu pen na khat ah a citakte in a lian nate tungah zong citak hi.” (Manta)



Additional resources: nature lessons, activities, music, Bible lessons, Scripture memory, and more.

My Bible First Copyright © 2015

Phone: 1-877-242-5317

Web: www.mybiblefirst.org • **E-mail:** sales@mybiblefirst.org

Unless otherwise noted, Scripture quotations are from the NKJV.